

菩提樹神讚歎品第二十九

爾時菩提樹神亦以伽他讚世尊曰

敬禮如來清淨慧

敬禮常求正法慧

敬禮能離非法慧

敬禮恆無分別慧

希有世尊無邊行

希有難見比優曇奇

希有如海鎮山王

希有善逝光無量

希有調御弘慈願

希有釋種明逾日

能說如是經中寶

哀愍利益諸群生

牟尼寂靜諸根定

能入寂靜涅槃城

能住寂靜等持門 能知寂靜深境界
兩足中尊住空寂 聲聞弟子身亦空
一切法體性皆無 一切眾生悉空寂
我常憶念於諸佛 我常樂見諸世尊
我常發起慇重心 常得值遇如來日
我常頂禮於世尊 願常渴仰心不捨
悲泣流淚情無間 常得奉事不知厭
惟願世尊起悲心 和顏常得令我見
佛及聲聞眾清淨 願常普濟於人天
佛身本淨若虛空 亦如幻焰及水月

願說涅槃甘露法 能生一切功德聚
世尊所有淨境界 慈悲正行不思議
聲聞獨覺非所量 大仙菩薩不能測
惟願如來哀愍我 常令睹見大悲身
三業無倦奉慈尊 速出生死歸真際
爾時世尊聞是讚已。以梵音聲告樹神曰。善哉善哉。善女天。汝能於我
真實無妄清淨法身。自利利他宣揚妙相。以此功德令汝速證最上菩
提。一切有情同所修習。若得聞者皆入甘露無生法門。